

ՕՏԱՐ ԵԿԵՂԵՑԻՆԵՐ

Ռ Ո Ւ Ս Ա Յ Ե Կ Ե Ղ Ե Ց Ի

Յունիսին Եկատերինոսլաուս հոգևորականների համագումարը քննութեան է առել ծխի բարենորոգութեան խնդիրը. ցանկութիւն է յայտնել՝ ծխականներին իրաւունք տալ քահանայութեան թեկնածուներ առաջարկել և եկեղեցապատկան գոյքը կառավարել: Կարևոր է համարուել հոգևորականութեան նիւթական և իրաւական դրութիւնը բարւոքելու խնդիրը քննութեան առնել. նաև, որ հոգևորականութեանը իրաւունք տրուի երկրի քաղաքական կեանքում մասնակցել:

Տօրոյսկում ս. Իօանն Տօրոյսկացու նշխարների սրբադործումն է տեղի ունեցել մեծ հանդիսով: Այս առթիւ հաւաքուած եպիսկոպոսների խորհուրդը հարց է բարձրացրել Իրկուտսկում միաբնակչութիւն հաստատել. քննուել է նաև ծխի բարենորոգութեան խնդիրը: Սիբիրի հոգևորականութեան մեծ մասը այժմ եկեղեցական բարենորոգումների յարմար ժամանակը չէ համարել:

Ներքին Գործոց նախարարութիւնը հարց է բարձրացրել՝ հրատարակելու օրէնքով ճանաչուած աղանդաւոր համայնքների լրիւ ցուցակը, որ տեղական իշխանութիւնները այդ հիման վրայ գիտենան, թէ ո՞ր աղանդին թոյլատրուում է պաշտամունք ունենալ: Յաճախ միևնոյն աղանդին հետևողները Ռուսաստանի զանազան տեղերում զանազան անուններ են ունենում, որից առաջ է դալիս շփոթութիւն: Այժմ կան 65 աղանդաւոր համայնքներ, առանձին անուններով:

Ռուսաց թեմերում գոյութիւն ունեն «Епархіальныя Вѣдомости» թերթերը՝ ներկայումս Սինօդը հարց է բարձրացրել, այդ թերթերը կանոնաւորելու, քանի որ այժմ միայն լրագրերից արտատպութիւնները և պաշտօնական տեղեկութիւններն են տեղ գտնում դրանցում. կարևոր է համարուում թեմի ծխերի կեանքի զանազան կողմերը լուսաբանող լուրջ կենդանի յօդուածներ:

Սինօդը քննութեան է առել Բապտիզմի դէմ կոռելու խընդիրը: Բապտիզմը ըստ ուսմիսիօնէրների տեղեկութեան, վերջերս մի քանի տեղերում, յատկապէս հարաւային Ռուսաստանում, Վօլգայի ընթացքով ընկած տեղերում և Սիրիոյում բաւական տարածուել է: Այս երևոյթը բացատրւում է նրանով, որ պատերազմի ժամանակ շատ գերմանացիներ քշուել են այդ կողմերը, որոնց մէջ կան Բապտիզմի մոլեռանդ հետևողներ:

Ի նկատի ունենալով ժամանակակից թանգութիւնը Սինօդը քննում է այն հարցը, որ քահանաները դիմեն ժողովրդին, յորդորեն համեատ ու չափաւոր լինելու իրենց պահանջների մէջ:

Ինչպէս յայտնի է ուսմիսի տեղեկացու ներքին խնդիրների համար նախագծուած է ընդհանուր ժողով. այժմ գոյութիւն ունի մի յանձնաժողով, որի մի ճիւղը զբաղւում է ամուսնալուծական գործերի դատաւարութեան եղանակը բարեփոխելու հարցով: Յանձնաժողովն ընդունում է, որ ներկայումս գոյութիւն ունեցող եղանակը չափազանց հնացած է և եթէ այս դրութիւնը մնայ, պէտք է քաղաքացիական դատարանին յանձնուի Սակայն որովհետև Սինօդը որոշել է այդ խնդիրը կարգադրել ժամանակակից դատաւարական կարգերի և պահանջների համեմատ, ուստի ամուսնալուծական գործն ամբողջապէս մնալու է հոգևոր ատեանի ձեռքում: Ամուսնալուծական գործի չեղու կողմերին էլ իրաւունք է տրուելու իրենց փաստաբանները ունենալու և ապացոյցները բերելու: Վկաների հարցաքննութիւնը կատարուելու է ոչ թէ ռատիկանութեան ձեռքով, այլ թեմական հոգևոր ատեանի միջոցով. հոգևոր ատեանի որոշումը հաստատուելու է թեմի առաջնորդը:

Եկեղեցական ժողովի նախնական աշխատանքները վերջացել են: Եկեղեցու գլուխ է ճանաչուելու պատրիարքը, որին հաստատում է Բարձրագոյն իշխանութիւնը. պատրիարքն իրաւունք ունի հոգևոր գործերի համար ղեկուցում տալու Բարձրագոյն իշխանութեան: Աւագ-դատախազի իրաւասութիւնը կրճատուելու է:

Ֆինանսների նախարարը խնդիր էր յարուցել կազմելու յատուկ տիպի խնայողական գանձարկղներ ծխերում, պայմանով, որ հոգևորականները միջնորդ լինեն ժողովրդի և այդ գանձար-

կղերի վարչութիւնների մէջ: Սինօդը լսելով այդ առաջարկը տուեց իր համաձայնութիւնը, եթէ միայն թեմական իշխանութիւնը, ծխական համայնքի քահանան համաձայն են գանձարկը բանալու իրենց ծխում: Առ այժմ որոշուած է նման ձևի գանձարկներ բանալ 2000 ծխերում:

Կ Ա Յ Ո Ւ Լ Ի Կ Ե Կ Ե Ղ Ե Ց Ի.

Հռոմի ներկայ պապ Բենեդիկտոս ԺԵ-րդը իրեն յայտնապէս Միջին Եւրոպայի պետութիւնների կողմնակից է ցոյց տալիս: Իր նախորդ Պիոս Ժ-րդը միանգամայն հակառակ էր պատերազմին. Երբ Աւստրո-Ունգարիայի դեսպանը ներկայացել է իրեն և խնդրել, որ օրհնէ զօրքին, պապը պատասխանել է—Ես չեմ կարող օրհնել այս պատերազմը, որն ամբողջ Եւրոպային դժբախտութիւն է բերում:

Պիոսի ընտրութեանը ջերմ կողմնակից է եղել Ֆրանց-Յովսէֆ կայսրը, որն ըստ աւանդական սովորութեան, պապի ընտրութեան ժամանակ ճնշում է գործ դրել և իր թեկնածուն անցկացրել:

Պիոսը առաջ գիւղական համեստ քահանայ է եղել. այդ համեստութիւնը պահել է նա պապական աթոռը բարձրանալուց յետոյ: Իւր կտակում գրել է.

—Ես ծնուել եմ աղքատ, ապրել եմ աղքատ, մեռնում եմ աղքատ: Իմ յաջորդին խնդրում եմ, եթէ յարմար կգտնէ, թոշակ նշանակէ ամսական 300 ֆրանկ իմ երկու քոյրերին և ազգական-նուհուն, որոնք նեղութեան մէջ են:

Բենեդիկտոս ԺԵ-ի ընտրութիւնը բաւական աղմկալի է եղել, սրա կողմնակիցները միջոցների մէջ խտրութիւն չեն դրել, տարածել են հակառակորդ թեկնածուների մասնաւոր կեանքը նկարագրող բրօշուրներ: Նոր պապը իր անունն ընտրելիս (կարդինալական անունը եղել է Դելլա Չեզա) յատկապէս ընտրել է Բենեդիկտոս անունը, որով ցոյց է տուել, թէ ինքը շարունակող է Բենեդիկտոս ԺԴ-րդի գործունէութեան:

Նոր պապը ազնուական աւանդութիւնների և գաղափարների ներկայացուցիչ է և վերջ է տուել արդէն Պիոս Ժ-րդի ժամանակ Վատիկանում իշխող նահապետական պարզ կեանքին:

Բենեդիկտոս ԺԵ-րդը հմուտ քաղաքագէտ է և աշխատում է բոլոր պետութիւնների ներկայացուցիչների հետ լաւ վարուել. թէև պարզ երևում է, որ իր համակրանքը Գերմանիայի և Աւստրիայի կողմն է: